

幼學堂文稿

幼學堂文稿卷三

吳縣沈欽韓文起

七夕賦

魚霞歛嘯麝月當樓扇承粉絮釵礙簾鉤風吹鬢尾花彈
搔頭數玉墀之細步指銀漢以迴眸於時馥繞庭蘭籟清
井樹杳杳星橋沈沈璇戶九枝燭難百和香炷李名朱仲
瓜出召平綺席牽連愛銀槃弄化生織字金梭紕穿鍼綵
縷縈百子池邊九華帳裏結解同心花裁連理翻羅裏而
飄螢鬪翠奩而祝蟠習共迴鸞矣同射雉別有君遊上苑
妾住成都空陳久簾莫樹萱蘇錦水雙死憐蕩子廬江孔

崔悔狂夫襲淒淒於白紵訴脈脈於黃姑至若珠露垂英
金飈爍葉燈暗飛蛾叢稀抱蜨挑迴文而絲斷歌緩聲而
字澀睇碧丸之流光掩翠屏而雨泣此夕僊雲擁碧波此
時絡緯急庭莎王寬玉軫愁調鵲徐淑寶釵怯畫蛾鬱金
堂前入夜涼曝衣樓上映朝光失喜芻尼傳吉語急開容
臭理香囊

麒麟閣名臣頌并序

孝宣皇帝起自民間厲精圖治海內蒸蒸羣品陶冶慨然
思疇咨之盛鶴鳴之治選賢與能信賞必罰輔弼之臣有
繼最材振之美爪牙之佐有折衝禦侮之威文法之吏有
經事綜物之長儒學之士有論議述作之蘊天工克亮庶
績咸熙二十五年之中薦享郊廟考定經籍符瑞畢臻蠻
夷向化文明憲章粲然大備歌頌功德炳焉與三代同風
雖一人元良亦羣策畢力之效也蓋文景恭儉家給人足
主德循矣而潤色太平之業缺焉孝武崇儒道修廢典文
獻彰矣而侈心遠大窮兵詔獄之旤滋焉孝昭罷鹽鐵酤

權與民休息而享祚日淺未暇有爲至於鼓舞丕變發越菁華集數世之休爲一代之則未有過於孝宣者也甘露三年呼韓邪單于入朝上乃推股肱之美圖形於麒麟閣署其官爵姓名自大將軍霍氏至典屬國蘇武十有一人明著中興輔佐比于方叔召虎仲山甫焉若黃霸于定國之流皆以功名終莫得列於十一人之數其選重矣豈惟當時雖東京之雲臺二十八將唐代之凌煙閣二十四人勲庸懿德亦無以加於十一人也夫有少典之崛起必有風后力牧佐命之臣有殷高之中興必有傳說甘盤鹽梅之用古之帝王未聞取相於昔時待將於方來至有臣而

無君則汶汶以沒世耳未有有君而致嘆於無臣者也然則此十一人者其遭遇孝宣天地泰山澤通明良之會鼓翼搏風揚鬐縱壑爲可頌也已余讀漢書輒吮墨染翰斐然之思不能自休次第如左以繼陸機呂溫之後云爾

大司馬大將軍博陸侯霍光

霍侯禁闔二十餘年心小任大知哲舉賢行周公事誅庚蔡蔡當阿衡寄擁昭立宜恬然若素冠於班聯岐然不撓立於艱難執機鍵牢鬱怒雷拔弩牙旣櫟一發穿札歛然天清人掉我寧處此句句溱足太平昭鑒其衷宣震於躬爲身家暗爲社稷忠烏庠赤其族而丹青其功

衛將軍富平侯張安世

安世篤行副位中朝克遠權勢以持久要當定大策危疑
傾側幹乾轉坤同心翼力驂靳轉圜風雲吐臆武帳傳詔
頡頏元老惟敞惟義愼同振槁大位旣承嘉謨入告暘演
皇風恢宏溍道雖居啓沃推功不名雖逾親重處寵若驚
剖符珥貂遺澤莫京

車騎將軍龍頡侯韓增

車騎之先出於亡虜杖鉞桓桓爲國司武實底忠貞式終
介雅拊柔煦和素絲委蛇豈無建明遭世隆平選才幕府
持節王庭莎車亡狀出疆誓壇一鳴刀斗血爨靈鼉旄頭

星落象龍馬還帝賀將軍舉得其人追思芳烈亮非具臣
後將軍營平侯趙克國

營平發迹北地良家明習四夷三世爪牙神爵之元羌虜
盜邊詔問將帥老臣不先願紆肝食鼓行而西期於殄滅
小利不入捐軀誅零首綴聚急虜曹震恐奔亡竄逸語女
亡反欲鬪不得有守倥偬獻議邀功璽書督責抗章不同
卒用老謀窟穴披潰旋罷屯兵振旅入對豈嫌自伐明示
利害年八十六功名終始漢之虎臣一人而已

丞相高平侯魏相

侃侃弱翁作漢之宰通曉故事洞明大體人獻歌頌我條

便宜人上祥瑞我言變災赫赫當陽泰階列張斟酌元氣
運於中央百司展采若網在綱漢廷公卿多刀筆吏儒生
嬖倖曲學媚世相也垂紳立朝無魏霍氏之傾實性之禍
昧其大功修彼小怨豈無令圖厥愠不殄

丞相博陽侯丙吉

丙公陰德著於巫蠱保養曾孫是哺是乳貫索纍纍冤氣
沈霾赫蹏一紙使者夜來盡殺頌繫以塞咎災冒死拒門
有親曾孫竟回天意活及萬人王賀黜廢公府奏記綠車
贊迎元龜定計微眇舊恩不挂齒頰感慨九重疇其封邑
旣侯且相式明禮讓茵汙貫曹牛喘塞障規隨繼躅巖廊

高唱

御史大夫建平侯杜延年

幼公寬厚亦明法律首發大姦分茅登秩論議從容經綸
宥密刻轢秋霜噓以冬日鹽鐵蠲苛賢良舉逸上書待詔
刊章載筆政裨清明行迸謾訕帷幄謀毗肺腑恩匹遠郡
中悔亞相終吉實叶天心佑民陰騭

宗正陽城侯劉德

昔元王敦師儒昌厥後紹前休惟路叔千里駒擇宗子與
廟謨有智畧韞淡櫝善平反矜庶獄稟老氏戒知足方霍
孟勢薰灼辭婚姻懼滿覆遇宣帝光中興肖厥象重維城

以盛惠參羣英中壘篤其貞新室國師隤其聲

少府梁邱賀

賀以筮顯勝以占縛其昏其明一龍一蠖高閣璘璠冠裳
魁梧鬱鬱文謨森森武庫文煥皇猷武肅天誅賀也經生
方領矩步爰贊鳴鶴頌歌振鷺嚶喈董生孝武不遇

太子太傅蕭望之

東海蕭生儒宗懋勗自守堂堂笑人錄錄高揖將軍不勤
吐握士各有志羞爲齷齪天子知名剖璞擢筠正議立獄
直節凌雲帝思百歲輔遺得人處周召任爲社稷臣嗣君
區霽僉王觀釁金鏡翳昏太阿缺鈍室祛蘭馨殿發鼠糞

吁嗟蕭生智勇俱困老入牢獄莫剛忠蓋趣和藥來死有
遺恨棟橈鼎折炎運不振

典屬國蘇武

蘇君丁年奉使絕域副謀不臧偷生辱國引刀自戕風吹
血涼天寒僵窖雪澡飢腸頭可斷兮却不屈雪霰紛紛落
旄節牴不乳兮鴈空歸吏民白服涕南揮衛律豎子不足
挂齒少卿名家蹉跌至此武受漢恩今日效死灑泣霑衿
嗟乎義士及慶生還悲歌訣別一顯漢廷一死窮髮昔送
河梁相望夕陽今看區脫何處故鄉淒涼華皓茂陵宿草
絕赫畫圖單于歎吁

陸宣公像贊

并序

唐之宰臣奮筆舌於五常備律度於一身足以正玉斗幹
金維禹湯之道久翳而白日一照典謨之風久歇而長離
一鳴舉首八紘游心千載吾得二人焉曰魏文貞公陸忠
宣公魏公遭選文皇盱衡貞觀骨鯁之道伸逆鱗之心格
股肱耳目之用立吁咈都兪之義孚風雲翕和丹青神化
質乎尚矣陸公當建中之末值危難之時渙號於旁午弼
違於倉卒洞識大體猜嫌苛矯之癥結解道迎善氣獷獫
睢盱之害機息雖昏德之不除亦降心以相就當其白羽
摩空丹旆雪涕干振達旦封事連宵介馬嘶風山城落月

主辱臣死忼慨借籌思旤敗之有由冀塞晏之共理泊乎
按行鐘簋告至壇墀君還黼座之尊臣守羔裘之絜恩眷
未移彌縫自苦泝登台袞何讓夔龍然而安危異致驕怠
並乘老成持正舉動生嫌回次營私趨蹌可悅羣邪項領
孤臣吞聲嗚呼共斯代而所奉之主殊同一主而所丁之
會又殊不與文貞比肩於廟堂而神交於冥漠卒之代不
竟其用人不被其庥豈非天哉夫鳥盡弓藏功臣所以悵
望直道事人志士所以悲懷故雖有李西平之元勲投棄
閑散權不少假也雖有陸丞相之賢輔竄逐巴渝威不少
霽也千金思購於戎馬之中而十稔不移於荒憬之地將

母迎勞於恩洽之時而匪躬嚴譴於讒沮之後腹心草芥
萃於一身士固有差池飛遁沈落光耀者矣若公之始末
尤令人流連慨嘆而不能已也永貞改元朝命方下虛舟
已逝黃髮不留向使賜環蓬藿收績桑榆當剿闢虔錡之
日庸裴升李之朝贊枳維之勤藉荃宰之化元和之治豈
不與貞觀同風乎公之三十二代孫曰繼輅清門淵雅抱
槩京都式煥儀形誣諉請志 欽韓於公爲縣人仰鄉社於
武梁感冠簪於皇信橋公銘鉞祗慙伯喈之文子產鑄金
聊誌臺卿之座

唐有貞臣屹爲山嶽無忝於君不負所學憂國攢眉彈姦

幼學堂文稿

卷三

八

張目經綸屈蟠直氣噴薄元成斌媚曲江風度一德九原
鳳騫龍翥公志巖巖厚豁喜懼公貌愉愉澹泊通錮至今
髣髴猶狀靈臺明星煙迴虛室光來如聆謦欬若揖棘槐
金鏡終餉玉山豈隕

九吟

九吟者沈子悼屈原之厄旁九辨之義而作也人情悲哀鬱結無以自舒長言之不足則咏歌嗟歎之其亦有所不能已也往古作者莫不祖其文采玩其風旨諡今攷古悲天憫人煙墨驅染代供憑弔坎軻之士兼以自傷余生三十四年爛漫無成出處兩窮饑寒日迫俛首偃促心長日短悲者不可爲縈歎況若原之驚才壯志長歌痛哭者乎然則所遭不同所趣亦異而流連諷覽振觸隱衷言之纒纒因命曰九吟聊以躡跡後塵爾

悲秋風之颼颼兮慘獨中乎愁膺登高原以遠望兮晻浮

雲之若蒸欲奮飛以假翼兮然愠愉而不得登固濩落其
無爲兮閱歲月之崢嶸追先哲旣日遠兮選孤生之多悔
嚴霜之下無榮卉兮積毀之後無完士懷貞亮其不易兮
勗絜絲之信美蘭蓼絕而含馨兮玉遭焚猶發采蘊嗽嘆
其何傷兮猶薄斃而自任遵江潭以媯惕兮攢青楓之蓊
蓼水澹澹而激素湍兮山嵒嵒而竦衆岑白日昭昭而徂
西兮羣鴈噉噉以迴南杳洞庭之雅奏兮逝滄浪之挈音
歛瞻顧於夏首兮綆清涕之淫淫違靈修其潢洋兮念効
忠之無人讒夫競自營其私兮夫誰與秉此國鈞思曩約
之燕婉兮纓蕙幃而自薦條修門其萬里兮舉瑤華而執

獻魂煢煢以欲泯兮精驪恍而靡所眄願一託於寢寐兮
心沸涓而至旦

絡緯宵征兮鳴我西堂蛩螭蜚轉兮習此虛房隕朱顏之
槿華兮散愁思之飛蓬形與影而曄喧兮憂與愁其忡忡
固時命之多屯兮何綢繆之坎軻撰至思而結芬兮頽美
人之薄怒悔禮容之未工兮匪瓊瑤之爲誤雖一斥而不
復兮頽吾持其修嫿衆颺菁而並進兮式玉佩之常度覲
歲華之未晏兮俟金閨之旦寤世趨趨而尙譖髀兮以魁
律爲彘尤孰弔靡之可挽兮穆嗟譏而貪求若麋鹿之甘
薦兮志非勵于好修眷獨哀其精白兮蹇日暮而亡聊旣

失職而啓咨兮屏江皋之優優商飈摧其桂枝兮零露菸
邑凋乎棣萼嗷哀鴻於中洲兮晶霄漢之廖廓編芰茹之
袷裾兮颯不可以禦冬援薜荔以爲屋兮噫咆勃之飄風
屑玉英而作糗兮攬饑腸其未充信吾道之邇回兮羌溘
死而厄窮沐膏澤以耀華兮濯冠纓而表潔冀渚宮之復
返兮揚醢醕於緹縹縱訣絕而相仇兮覽明鏡其自悅
服古人之明訓兮斐陳詩而止怒激哀吟於芳洲兮紆氏
惆之積愫林莽揆籟而助悲兮羈雌喑喑而不能去湘神
鼓瑟而赴節兮破蒼梧之愁雲渺章華之遼濶兮竊睥睨
而無聞腸束楚之綢結兮淚流波之潺湲嗟芙蓉其凋瘵

兮曾未識乎陽春思玉階之青苔兮襲綦屨之芳塵椒蘭
日進其愁患兮孰以孤芳爲可采朝曦曛曛而不照兮傾
葵藿其又何歧心剖蘭而無訴兮指九天而要之詔三彭
以爲證兮呼招搖使受辭寧若華而燭隱憂兮酌玉漿而
散煩思繫先后之聽瑩兮不遠復而底吉周公遭讒而濶
沐兮卒返駕乎原畢蹇叔用諄而謨詢兮職無寫於黃髮
終慶流於蟬嫣兮騰夜林之嘉實彼墨屎其遑恤兮鑠神
明之昭回胡芳澤之不辨兮飾隴廉以爲妃驥頓絆而遠
逝兮騂蹇驢而服驚駘紛樹棘之得刺兮曰梗枏爲不材
悽悽兮山阿幽幽兮薜蘿駕欲騁兮路良阻心未改兮髮

先化顧田儼兮獻嘲思夫君兮奈何

端居啁嚻兮何所念雄志捫爽兮案長劒覽風塵而勤咲
兮棄往甯之龜鑑鼎與蜎鳥爲羣兮蒸入虎狼之國縈佩
玉之盈庭兮享其寵而忘其辱無巴蔓之伏節兮孰繼包
胥之芳躅雲黜霸兮峭坂日纁黃兮漢濱父老嗷咷兮廣
卒辛酸宮車聲杳兮路寢生塵不能先朝露而萼螻蟻兮
痛摧制其煩寃彼衆衆之骹骸兮椒與楫又滿闌拌家國
而憎他兮錯枉直之澆饋陳懇欵而微諷兮汨吾又逋乎
江岸傷過隙之纖塵兮邈前歡之墜雨次山鬼於幽篁兮
湘水僊之芳杜狐狸鼓蒸舞吾前兮猩猩號煙逐吾後秉

天質寧自卑兮粲圖史而尙中古謁熊繹於荆山兮驂重
華於曠野精衛小而竄洪波兮孔雀飢而矜綽羽雖慼鯁
而彌笑兮又何誅乎刀俎相薦敖之令典兮郢得宰乎牛
耳懿昭陽之執珪兮奮厥武於千里彼子文之毀家兮非
忠貞其焉耆追鼎鐘兮不遠期荃蘭兮共理

惜嘉樹之搖落兮歎蕙艸之消歇霜露淫液於百卉兮倏
臍申之以霰雪諒嚴凝之不相抗兮何生意之能勃託微
生之耿介兮荷聰明之峻潔不碌碌其如石兮寧汶汶以
受物謂因材之敦植兮渠遭世之指的冬祗稠之須捷兮
藜藿茹而不飽誦典籍之紛綸兮握璵璠而爲寶汨世故

之流離兮異山林之枯槁惕白日之晚晚兮易壯齒而華皓樹金蘭以爲枳兮藝玉芝以爲糧貴從風而馭辭兮媵種裕之颺菁佇美人於碧雲兮撲屬久而不芳俗迫我以顛頤兮姱好爵其相羊汔偃蹇而繚戾兮心怵憚而不寧偁親友之離邊兮艤山川而徂征紕旅思之將圉兮重促序之慄慄不隨俗而配已兮斂虛襟之蕭瑟心連璣而緒繁兮睂蹙岫而顰結縱食閭其何斟兮豈幽憂之能失激繁響於砧杵兮颺秋心之伶俜澹涼蟾之同回兮匝八表而孤明哀湍赴于大壑兮浮雲逝乎平岡獸失羣而偉皇兮鳥遶樹而悲鳴極沈寥之曠野兮夫孰可慰乎羈情愁

偃促其焉知兮倡烈士之激昂傷金石之非壽兮藐天地
之虛生重曰秋蒂翩翩易萎落兮霜英燦燦榮未蓼兮瑤
琴不御憎叢薄兮勞生超世玉抵離兮吾寧枯項返安宅
兮

飾章甫於越俗兮奏咸池於巴歛豈獨翫翫而不安兮將
羣詬以爲辜恭鄙夫之易軌兮勵貞士之矯修陋循塗之
趑趄兮攬六轡其焉如旣旁皇于山澤兮違鄢郢之舊墟
誠思君其鬱悠兮幸不聞覩乎譏諛儷後凋之松柏兮銘
往懿于風雨解瓊佩而邀宓妃兮結翠珥而遺舜女朝霞
攜其思幽兮夕波蕩其心寫舒嘯歌以道湮壺兮牒獨甘

吾荼苦羈翩啾啾以集櫚兮蒸嵐霏霏而承宇相于懷之
沈澹兮然侘傺而无耦寄尺縈兮沔流或脂轄兮郢渚君
其悔兮思予忠予欲往兮逢君怒含脅鬪兮遑趨起縈歎
譖兮曠延佇思鼓橐以廓重氛兮恢六合之清明敦同僚
於皋夔兮致靈懷於帝皇皆山膏之謠詠兮又欽鵠之披
猖載輶車入闔閭兮妖閃屍之難詳償靈懷之盯睇兮乃
傾聽乎帷房以游氛爲可賀兮詔中射書吉祥紛總總其
抵巇兮卒造亂乎家邦倘殷憂以啟聖兮固悔旤之未晚
怙白過而自遂兮乃一往而不返歎吾謀之不緝兮謂楚
國其無人披腐心之沸渭兮雪酸涕之汎瀾憂剝運之罔

極兮經創鉅而冥然瘳湯沐之未具兮蝨蠕蠕以處禪已
焉哉璇玉瑤珠棄若泥兮并蜂毒螫投滿懷兮山巔水涯
憺余思兮湘流森森恨難追兮

思蹇產兮曠難出其勃窣心緊絳兮牢不解其煩結登高
山兮雲爲之湫戾臨清流兮波更寫其歇咽掩戶匡坐兮
志沈菀而不降伏枕假寐兮魂怔擗而積憑出門悲兮入
室歎悄積蘊之懣懣願託志於飛隼兮渺宕冥之難从嚴
霜旣羸其芊蕞兮何芟茲之攢生彼黨人之噤害兮羌不
可與並世追緇衣其不作兮孰能敦厯乎道藝懲往昔之
婞直兮庶摧矜而抑銳欲嬖嬰以從俗兮嗟吾道其何賴

愁崦嵫之日暮兮蹇淹留此芳歲戒豎亥使先驅兮鞋駟
虛而觀八紘東吾至於暘谷兮猷建木之朱榮吸沆瀣而
滌埃塏兮介青童而謁東皇逢若士之連燦兮僑汙漫乎
太清澄予慮以裊裊兮竭回車而孤征聽弱水之梁灊兮
聊息駕于玄圃扳瓊蕊以止渴兮開明狂趨而嫫怒誣青
鳥以爲媒兮歆蒸旭卉而迷洞戶銀丸昱其流光兮睇睴
邈乎大野指玉衡以徂朔兮紛雪霏於寒門鞭燭龍使吐
耀兮照藏結之肺肝體疏屬之顙顙兮弔貳負之冤魂廩
陰沍之難久兮浩揚舲乎桂林金沙灑灑其可采兮繡羽
嚶嚶其弄音被纖綺於翠幄兮折幽馨於碧潯傷榮煒之

易落兮哀余思於江南謝豐隆兮回沈而朋阿怨蹇修兮
誤竊窈於室家心慊慊兮可奈何水無魚兮長咨嗟

思余過以內訟兮憤不知衆之所求忖頡頏於彩伴兮羌
獨以我爲讎縲歎捫之成痕兮指嚙笑而皆尤曾邂逅於
際會兮承眄睞之嫺都儵始妍而終醜兮心嫫蟬而搖搖
洵嫡服之非容兮顧芳葩而含羞內懊咿而下堂兮限君
門之萬里伏蓬蒿而危欒厠兮君之怒其未已懷慘毒而
孰信兮戢形影而自鄙衆枉固不可與言兮親串又以余
爲舉九女貞而譴死兮陰競忠而奔亡撫前世其固然兮
丁余生之不臧逝往渥其如水兮轉今恠其若環忽忤性

以自訣兮旋慄思而復還日隍企以缺望兮然捐膺而無
聞確彭咸之芳行兮申信誓於靈淵朝聽鷗雞之啁嘶兮
夕弔寒蛩其慄惘軋窮冬之罔沕兮瞥管魂之迢迢猜扶
菸之茵桂兮氣淑郁而揚芬机紫蘭之葢薜兮纓玉佩之
蚡緼棍肄枿而作爨兮又何有於今之人壅火燎於原藪
兮固不別蕭艾與蘼蓀積欸欸而冀納約兮匪珪枿之榮
也效史魚之尸諫兮宗祧實式憑也彼伏軾以遊說兮馳
艾之爽也爽音生馬融傳注陳侂詩以諷兮何百讎而不一聽也
諄曰鼉鳴鼉應庶類相感兮闐闐蕩蕩越閭而胡窗兮赤
臭播闕薰霏霏其不可染兮甌夷止丸讒口何闕兮無飾

刁父以錦无授不占以劍兮

滄浪之淵潭以泓兮瞰百丈而見遊鱗荆山之隄暫以凝
兮眺千里之行雲故研幽必鏡清兮察遠必窮巔鏗左右
之鐘懸兮蔑瓦缶之喤呶貫惇史之論議兮厭宮童之唼
齏相樸忠致厯褫兮何賴儂佻與齊給儼正容以悟君兮
紛僭螫乎巧佞赤舌燒城兮口噤陰而莫競蠟蠓負天而
觸翅兮雲霓空蔽以交映辟甸人其非患兮軫怵愠乎郢
郢珍橘柚之嘉實兮奉之乎玉槃積三載而不御兮斲苦
李謂甘鮮磔鵩雛而招鳳兮鳳宜其絕霄而高騫持一葉
而蔽目兮烏識夫阡陌之東西歲忽忽其就邁兮悲鬢髮

之已宣當吾世而抱恨以終兮曠千載而思其賢長太息
以擗標兮懼荃之不余悔颯纒粉袂而廁裸程兮固不如
襲而蝕其光煒穆流四方其靡騁兮吾寧伏死乎江涘瞻
靈圖而奇倣瑰兮通精誠乎髣髴判神奸其胥服兮懿嫫
媿爲余悅召靈子而擊鼓兮奠瓊茅於綿蕝般僮僮以坎
下兮蒼龍白虎髣而按節衍宴娛而酖顏兮指玉梢以囊
羊颺旋雲移其歛忽兮駕欲追而不得驤介子天地以爲
贅兮昇濁忽之甌殃芳菲菲其不沐兮奚羨于不死之鄉
後之辟王以吾爲鑒兮嗟令德之不可忘

華嚴藏舍利鉢銘

并序

毗盧華藏者菩提之資糧應供之甘露也昔者天眼未通
示彈指於彌勒報身可應誓宏願於普賢三十九品鐙王
設其高座五十三參樹神威以行厨重重香水不隔微塵
萬萬華雲盡由毛孔是以吉貝書傳總祇夜伽羅之部榆
欏爾至究馬鳴龍樹之籤足使三車六驥事火之障悉摧
五葉一花寄水之功可證則有澗名長者上行先生惕危
脆之頭被精進之鎧堅持木患不戀地肥雙林蔥鬱傳大
士之梵音一室圓樂龐道元之宗印學兼黑白識起青黃
悲生忉利之宮寶階恩報夢契莊嚴之論珠柱光然於是

迎波匿肇先之像效純陀最後之供摩醯墨點悉呈半滿
之文烏窠布毛更質身名之句則有趙郡李構憑皮紙骨
筆之忱燦忍草覺華之艷宋宣和三年雍州天寧寺之藏
也雖難陀激水不沒革行毘嵐吹風寧灰梵夾而刹那劫
過俱虛舍遷堅固林中無復銜花之象菴羅園內僅畱乳
柱之獅嘉慶十二年觀察毘陵盛公式新倉儲爰施畚鍤
弓拓牛鳴局開螺吹驗佉盧生粟之碑知須達布金之地
欽其勝果亟加掩護惟瓦鉢一枚貯舍利數粒觀察夫人
沈氏秉摩尼之慧地發檀那之善根供以香花弄以緹縹
則知熙連河畔金斗分量阿育塔中銀函重啟舍利本幾

生眷屬藥上有無量福緣廣長之舌蓮萼爲臺吉祥之胸
梅檀作骨故得木菌生於園林德瓶出其天器豈徒吞嚴
一之珠具淨音之饌比功德之門立迴向之域哉慨自正
法已遙羣迷罔覺鑿井得空空於何著移燈去暗暗又何
從阿難巾結愈解愈紛富樓風輪相摩相盪蜂戀彼花鳥
疑別食耳億之琴未調那律之針孰貫所以影消石室路
沒青梯非津梁之疲實貢高之慢宏茲因緣要歸清信彼
病夫半果饅女一坩奉弊食以生天去汙坯而入聖况籌
下雙修鞭垂三匝花施善慧金補飲光洵足繼躅前塵傳
輪來記敢效盤盂之銘卽寓雨花之贊若使獻乳糜於樹

下逆水能流被瓔珞於机邊投花便滿詞曰

銀脅垂光金輪轉法鹿苑智通驚巖淨業涅槃真諦健椎
結集七處八會十號三身福城結轍妙峯通津鬘雲供佛
髻珠隨人樂樹喜園道芽聖果三佛供宮四天奉座圓礎
印開鏤罍縹裏貯龍已去遶雀猶飛尸陀早悟梵唄可希
衆盲言象誰知是非

趙節女碑

節女趙氏陽湖人太學生某之第三女也季札之鄉齠齔
知讓娥親之裔巾茵蜚英太倉五女緹縈最著孝儀三妹
令嫻尤才纔及周晬母患乳癰拳跼抑搔悲涕就哺豈獨
膝前翦鬻忍痛於慈恩室內吮膿鍾義於弱歲迨乎玉映
鵬辰蘭芬卅日左家嬌女謝氏諸郎其同縣黃氏續舅甥
之誼聯兄弟之親遂委禽焉旣逾墮齒脩學畫眉駕機侍
母饒爲織錦之工鵲硯隨兄便有頌椒之思十三歲聖善
災罹鞠凶創鉅方荀灌之年具文姬之行股七和劑目睫
赤衰此則栖烏之樹設奠助其哀鳴卧魚之淵繞廬澡其

芳絜者已嗣是筭總早作鍼繹率先含菜縕絮煮梅蓄蘭
延滄夏蕙視郭輔之媛絜修春韭推季蘭之女豈意女蘿
猗儺松柏先摧孔雀裘回綺羅未著丙寅歲黃氏子卒傷
緋衣於王渾畢青簡於杜參於是泣請奔喪誓同勞面鸞
照鏡而長哀鶴舞市而永逝越一載竟絕穀而殞嘉慶十
二年歲在丁卯之九月年僅二十篋留麻績扉有粉書以
北宮之淑姿蹈西山之高節其父方遊關中戀切牽衣禍
嬰同穴金環自殉玉珎誰披嗚呼哀哉乃醜懿行雪涕請
文義昭彤管詞慙黃絹但使浣衣石上雲垂愍女之碑投
金瀨過月皎義姑之闕

與張子白刺史書

胥江爲別歲星一周每良辰結侶霽景浮林麋九蜚華鶴
觴湛淥矯首隴雲何嘗不眷閣下粲花慧業淩雪清標不
獲如蜀郡男子芳溢洞簫蘭臺令史英馳神雀乃背良儔
驅傳馬溯鹽澤指魚障逐迷唐之羌作燉煌之吏飄飄絕
塞有類景真桮遲遠宦殆同亭伯何其摧抑與泊乎三年
報最萬戶增秩移官關右遷牧烏氏赫然流美卓爾有爲
信知至道弛張要由經術前修通塞無累靈明荀朗陵以
愛閒辭職龐士元以屈志曠官核其宏通尙乖雅量金涼
佇運餐衛適宜瓦亭舊壘郤對笄頭之山蕭關故道最憶

彈箏之峽漢武饒歌隗囂戰血想五馬踟躕抽豪命札朝
霞夕露鬪麗呈鮮欽韓牧羊挾冊負米懷鉛偶塵鄉薦覬
伸延貢折膠鍛羽薄遊秦中郭緣生述征之記馮敬通顯
志之篇祇感牢愁不無仄足望玉山而伊邇懷瓊樹以猶
勞尙憶零雨送秋翠巒開曉弭櫂屬雲題襟刻燭昔日追
遊宛然心目少壯幾何歡悰非舊諒芝顏自駐鳳苞常輝
不假丹砂久要金石素月在天涼飈入戶飛鴻送目馳戀
良溪盼枉瓊瑤慰其杼軸

代劉芙初與盛觀察書

秋仲拜書雅荷獎挹長君發解歡騰所部急欲馳尺疏通
賀館中鹿鹿因循致緩人之情當血氣始壯方求官覓舉
從事於發策決科當其時萬事不以撓心而於機聲燈影
見童孩劒文祿衙衙學語心焉計之未嘗不願他日之能
繼我業讀我書也旣而求名已遂仕宦漸通顯向之緼祿
學語者且厖然大纍纍而有髭則又舉曩日經營仕進之
心轉而望諸後人其命之通與塞才之敏與拙未有不神
忘形茹詿詿盱眙僕隸窺其隱夢寐縈於衷至兄弟鴈行
有一得一失之相形則心愈何惶而不可解諺曰雙陸無

休勢鴈隼之引子也必窮其顛而止仕宦之家彌念簪笏之無替不其然哉今閣下賢子二人兩年之中騁駟開道鬚然而角立焮然而雙岐其于陳寔之紀譙楊淮之喬髦則不敢知而舉所謂呻吟儒術諸生家法一朝付之此心誠可以無負矣雖使閣下他日登槐廳仗旌節其愉快豈有過於是哉抑又聞古之大人其能享大名膺景福彌高明之忌通豐嗇之權則以禮賢薦士爲垂裕之道貽厥之謀凡高才之不遇者知而游揚之見而禮待之惟恐其不至天下之廣不能盡識也卿大夫之貴不能行滕懷餽物色人於蝸牛中也拔一士而使人可歌可泣風烈聞於後

世福祚及於子孫史冊所載至今以爲美談可不美哉今
天下太平士之生此世皆得以科目進固無待於薦揚而
士大夫蒞官恪勤亦未渠期於崇獎風流藻鑒人倫之任
其於高才而不遇者苟能衣食之喫咻之矜其飢寒而慰
其痛癢斯亦可矣閣下所部中有僑人周爲漢者負瑰奇
卓犖之姿工沈博絕麗之文縉愚不敢知抑亦可以比于
古之高才者矣彼又不幸而丁疾苦死亡之厄迫淪轉溝
壑之憂此則蹈於水火之急也仁人之用心濡手足焦毛
髮徒跣呼號而出之之時也所謂拯一士而天下之英皆
嚮風感涕若人人身受之者爲閣下計宜無過於其人其

時也綽與周生最交好知其忠信貞亮又通曉世務不僅以文章絢爛推服於儕輩文禽翠羽嘉卉芝草無當於用猶且以光藻悅目競取爲嘉玩況文章氣節之士具華實之美者乎昔李翱薦孟郊於張徐州其言甚戇翱踈賤士建封功名赫赫人而納其好德好色之戒不以爲罪是則下之進忠與上之嗜善不以卑賤而自嫌不以尊貴而拒人交相倚毗道固如此綽之不肖不敢比於李翱亦願閭下之度越於張徐州也親舊之贈廉從之飽直仕宦常事耳不謂君子之用心無過於此也長民之急務莫過於舉賢才以夾輔古今之大患無甚於賢不肖之混淆由其道

則日見其潤失其涯則坐致槁落人之有諍友直士若植
物之待雨露焉尤不可不思也閤下天性長者緇衣之好
具之有素于周生旣矜恤之不爲薄而復盡其區區者願
勿以爲尋常衣食之人無後于珍禽妍悅之玩則嘉言讜
論彼亦有一得之報使先達後進兩美於輿論庶幾乎古
人之風大福之集爲子孫之法焉惟恕其狂瞽而采納之
幸甚

答張翰風書

翰風足下六月十三日得自洛陽所寄書知觸熱至都騎
驢覓舉良苦然友朋如申耆祁生與其遊處又甚樂令離
羣索居者爲之神馳也僕來此已兩月矣謔言不聞於耳
鄙俗日積於心儕輩皆嚙卷突梯習里巷猥俗之談以優
童兒子比量其睂目顏色羅酒炙歌呼謔浪爲樂不則憂
貧賤念妻子衽席燕好之私米鹽細碎之事絮絮作爨下
老婢聲而以亡所訾省枵然蕩落如僕者介於其間默默
不自得猶復淋漓酣嬉與之酬答終不能勉強不得已同
阜而食共埽而棲足下知僕意有所適否也神志稍閒亦

頗涉獵於文史慨然有志於立德立言之旨千秋萬歲之名然年齒已長事故日多見不說學者蹙然憫其愚無知識汶汶以待老死退自尋省乃復內熱赤頰怛然汗下上之禮樂兵農經事綜物之才不足以應當世之求下之天官地理名物度數之學不能與專門名家頡頏而角逐至於詞章小技雕模物象纂錯雜采等諸草蟲之自鳴孤卉之獨秀而已其傳不傳又未可必亦何以異於束書不觀汶汶而歿終其身愚無所知之人哉僕之資秉自料亦不後於人若使早得師友之益優遊述作之林不汲汲以衣食營求爲事庶幾所造窺見古人命之不辰浮湛閭巷艱

辛蹉跌拮拾僅此誦邴原孤者易感貧者易傷之語泣然
不知弟之何從也自顧負負深願同心之士不棄之而終
教之驚蹇就銜終愈裹足膏油繼晷猶勝冥求以此自寬
亦冀足下之共勉而相與以有成也比聞足下究心方技
雖古之賢人君子亦時有通乎此然昔人通一經猶患其
不中博士今則博綜九流包羅四部而號爲儒其亦屑屑
焉有所未遑而洒洒焉愧其名之不稱乎至技術之流人
守一官世習一藝一祝也而有夏商周之殊求其精也亦
綦難哉扁鵲之帶下小兒無所不可故史特著其神異足
下審於儒術無所歉焉而爲之未晚也南中消息闊焉已

半載慎伯晉卿行止足下處宜知幸相示秋涼惟自愛不
宣

陸梧庭哀詞 并序

同歲友陸君鳳藻以嘉慶十三年夏六月病卒君抒葩華之才勤油索之業不繡顰幌自醅椒蘭以爲勒名竹帛藉寵銀艾膺黃埃之福賁綠衣之富而屈於上計契其絕塵乃箸錄辟雖懷牒京兆果掄賓興籍譽人偶暨都省程試隨輩報聞挽鐸遄歸黹脂攻苦甘泉之賦頗患腸流禮經之詮頓嫌心耗不登人爵奄罹天天嗚呼菟枯序促生灰路分念素帛之義欲篆桓睂負錫衰之期未褰簾吹聊同邢生之詞終播孔褒之烈爾

墨家勸學文人尚辭飾茲脂粉粲厥芳蕤雒誦之子羊質

虎皮買赭有土見牡思飴咨哉陸生契情元賞玉骨內涵
金心外服覽梠靡遺製表遂廣駁華麗采噲咍答響余亡
些睂知懷面牆覆書溼被挾冊亡羊輒嗤視肉思敏智囊
瑞隕黃茵悲生白楊矯矯乘黃偶羈駿足秩秩拖青獨登
鬼籙像飾眇光巾箱閱馥阿驚朝唬敬姜夜哭蘭階舊枳
槐市新巢垂簾日翳掛塵風搖酒壚飈旆畫舫停橈遠春
黯黯綠波迢迢疇昔清燕高齋至止蟻樽浮清鴈鎧落紫
遠壠行雲涼襟逝水望哭秦關述哀燕市電絕文采露晞
山阿魂爲芳草睂含碧蘿空臚方絮莫佇結荷依稀名字
猶炳縈娥

徐性夫哀辭

并序

歲在涂維月當單闕武進翰林院編修記名御史徐君廣
颺病卒於京師僧舍嗚呼哀哉朝采沈光喬柯落節寒門
榻瞑悲谷稅瘠白社之談淒其風雨黃壚一過邈矣山河
又況庾生綵襍月冷嘯烏秦掾寶釵香消化蜨渠父睂梨
不畱園藥通子升角未發楹書一歌薤露百恨凌雲此則
金刀掩芒有過威明之憐玉樹埋恨尤深武子之傷也君
之弱歲飯麻蓬翳執卷槐陰辦琅邪之裝具齋蜀郡之書
刀旣射策甲科校書東觀賦有征艱對馬柳而染翰歌傳
企喻撻牛尾而倚聲方且魚羹常膳堪分庾景之餐甘饈

封書無待謝玄之釣而祿薄侏儒券多負媪貧果累子憂
能傷人鬪鬻難祛談詒忽構齒似貝編誰借車於曼倩形
皆鶴下空乞米於舒元於是賃一舸以遣家寄半龕而襍
被占搏搏之闕月唱磊磊之曙壘逢驢道上聊寓詼嘲警
鵠露中每多根觸金梳玉釵之戲墜雨秋蒂之悰可爲索
歛者已若其敦睦之懷公忠之操沾沾自喜塲蘭槐之根
咄咄書空具鷹鷂之志赤蛇之祥方期易綬白鷄之寢遽
應飾巾戀朝班於褰俠數弔客於虞翻嗚呼繼營復日知
賢者之多勞象泣灰皮笑達人之何薄風流邈矣毒痛奈
何僕解輶秦關望衡蕭寺異候門之伯騫等握手於孝章

陳局露初奠，靈星晚同心。苦岫沈醉釀，川屬當綿惓。猶慰
隱親愧七發之空陳，厄三壬之繫定真。長稱藥不返，營魂
士刲視含堪呼淚睫。脯脩麥糲聊陳束，哲之文白蓋雙騎。
夏效郗超之誅詞曰：

悲生命之脆薄兮，眴朝夕於蜉蝣。汨大化之絙人兮，負刺
促而亡慘。擢良幹兮不落於斧，蘊寶璞兮孰采其流髮。未
宣兮生意，瘁心如蘖兮懷離憂。惟六極之傷貧兮，夏百歲
之弗覓。彼獐劣其睂秀兮，令賢達之中夭。胡積慳之銷爍
兮，亮祿命之弗福。嬰沈痾之殄殢兮，匪藥石之爲咎。戀一
官兮未遷，奄孤櫬兮自滯。鮮賻襚兮，槨周霖總麻兮，窆次

幼學堂文稿

卷三

三

孰高堂兮抒悲孰遺孤兮撫涕效承懽于奉檄兮指中臺
爲同寮拜封事於夕郎兮乃歛退而就高衣豸繡而還家
兮終侍老而消搖歟凶問之遠艘兮想盡室以號咷託傾
蓋之微尚兮謂斷金之久要乃情盤而景遽兮溢蕙隕而
蘭凋瞻虛室兮斷簾旌拂遺榻兮竈網縈尋舊題兮墨蕭
瑟遺藥銚兮臥苔局悅音容之可接兮假魂夢之弗爽叶生
馬融傳注邀落月兮澹澹溯悲風兮泠泠閤重泉兮幽晻
飈兮伶俜重曰蒼波逝兮無極秋帶墜兮何許艸芳醞兮
接夏撫朱弦兮終古非金石兮固多淪如萍蓬兮偶相聚
感鳴號於煩氣兮信人生之有侶長河浩浩兮吳雲靄靄

千秋萬歲兮返其幽竈匪鼎鞬之足榮兮繁芬烈之不艾
琢貞石兮璘㒼慰元壤兮佗僚

送吳山尊學士乞養南歸序

代

黑書綠字臨侯玉匱之經鳥篆龍文柱下金壺之記鴻德
資乎鴻筆人文象乎天文自金推建維蒼渠執契邢天制
長離之詠母句弦復旦之歌昭昭與儀璘賁其麗煜煜與
龍轡炳其采如學士吳先生者丹青聖化金玉王度其東
壁之明星木天之智玉與先生氣得中和手握文雅門窺
半面塵應五官荷戟入榛辦慧心於揚信結繩執卷歎勤
業於李充加以受少瑜之青管分子雍之墨丸落紙珠鏗
揮豪錦粲頌著嘉禾郡相致其冠禮賦成濛汜司隸迎於
傳車王筠新製已寫屏風柳惲全篇並傳團扇固騰琳於

江東蜚英於日下矣猶且寒膠三折飛蓬十年結軼資孫
宏之車宿春乞仲開之絹刻櫟樹而畱題駐馬鞭而述賦
逮乎通籍西垣紬文東觀高齋學士儒林丈人旭歷銳銀
之志波荷雲詭之詞卿雲僊露之篇山柱河官之作給札
則不患腸流占書則惟愁腕脫時則我 皇上發書林
而覽記注集官儀而定著作綜金枝郊寶之文重摩研編
削之任所以敷宣景耀糺縵光華龐襜冠于百王大孝彰
於千禩先生綴筆紫荷定草椽燭青烏白澤見百年之威
神玉緯瓊綱粲九功之品彙旣而蓬池第太真之詩秘省
最文疆之奏神雀之頌雖媿五人石闕之銘終推一手用

是升座七寶承旨八輒賞花釣魚之宴重鑠上笏之盼天
庥方隆瞿然有念歲之已巳先生感耕雨之纏綿慕采蘭
之芳絜辭北門之榮乞南陔之養時則青燁乘規元鳥睇
室野芳赫而暉綠山翠蒨以附蒼九花之樹與扶老而藻
春五色之芝共日華而縟景綵襍挽與雲麗洪厓之洞紅
螺酌酒風漪六一之泉至若德爲龍光聲化鶴鳴釋周磐
之詩續宋躬之傳豈非冠蓋之風流人倫之師表哉一時
金閨之彥懷蓼莪者升高望遠歌驅駒者出宿餞行夕陽
欲下悵別袂於龍門春水方生候歸艗於鵲浦小子不敏
斐然有志聊陳連狝之詞式贊縉綰之雅爾

徐堅煙墨箸錄序

古畫無題署唐宋著錄但記其源流工拙品物名狀而已
自後鑒別益深姓名益詳秘府霞帔之收掌世家紗厨之
什襲品第益高書題亦益夥俊人韻士以得寓目挂名爲
幸蓋自元明來黃王文沈諸家出率自記其意趣所得而
朱存理張青父輩蒼萃爲書於收藏題詠方名斗檢不少
遺弃非以千百年後縑素碎圻丹青黧咸甲庫上品有存
有佚存者復非完好要不若壽諸簡札臚陳古懽可以見
當時風流所寄固兵火所不能殲雷電所不能奪者乎吾
吳徐堅先生家光福以詩畫刻印知名少遊江淮間世之

賢豪長者靡不交久乃足跡歷萬里泰華匡廬靡不登頓
邱壑勝概肝肺槎牙抒磊落英多之思寫崔嵬蹇蹇之狀
故於畫益精聲聞耆壽徐髯史癡而下不數也歿垂二十
年真跡益可貴於是其門人許君兆熊就家衡所存卷軸
輯而梓之皆士大夫引額題尾歌詠贊跋姓名落落無慮
數十人雖其書幣請乞散落四方不能一一料檢覽此帙
者此於今雨之瑤華過眼之雲煙兼足觀其大凡矣吾又
思千百年後向之鉅人名流鄴騎長頸染翰封函亦皆風
流自賞其能自樹立著於史窾播於藝林善矣則又有簪
纓烜赫而泯昧無聞反藉是書以見焉此則許君綴集之

志後有攷古者所爲流連難息也

池上草堂記

出姑胥門舟行七八里兩山屏列煙旌翠幄崱嶮相襲者六十里太湖匯焉亭聚之盛曰橫塘曰木瀆瀕湖爲光福地較遠境益幽宋處士顧禧漫莊之所居也東西二崦環之百泉淥淥瀟瀟黛渟膏方舟疊舸蝦菜所集池上邨在西崦北又境之最幽者許君兆熊精廬在焉堂三楹面南熾菑隙地雜蒔花木天采貞萋風馥露沐其北墉開軒三楹綺而西夾室一楹北向亦如之平瞰方塘開幌含漪流楮延罔魚矚鳥頽林錦淵鏡又西蛇行一徑爲藝鞠之圃從獵衡獵列援編枳颺菁金行餐秀黃中橘香酒熟悠然獨

笑其東墓田十餘畝槐風松霧石室金鄉此子荆除服之
詩安仁永逝之賦所由作也並南有陂谿爰設糝養魚差
鱗徙尾鳴榔貫柳濠梁之趣託焉大不閤侈小足間居洵
小隱之津元山資之選勝矣若其煙嵐水木之佳峭泓蕭
瑟之況仰溢新眺俯周清漑山則層巒疊巘是僊夫騎龍
弄鳳佚士披裘擊木所上下也水則通津巨浸是鴟夷之
徒挈舟而逝松陵之侶投竿而娛者也故不出戶檻而裁
雲雕月嬰春餞秋陶冶性靈景物皆具或良辰命駕容與
聊浪林徙雲客望衡簪袂撫琴舒嘯山響泉渟則幽棲之
樂事備焉許君讀書好古爲今之顧景繁天閼絕景待其

人發之若僕者傭書自給無田可耕子美草堂之貲堯夫
莊宅之契何所望焉他日扁舟造請相遇於柳煙菰雨中
挹其高致擱我煩襟爲之神觀飛越矣

孫烈婦傳

烈婦顧氏吳縣木瀆鎮人少失父母依兄居兄貧以鍼紉自給年踰笄孫某聘婦於其季子孫亦窶人三子皆奔走列肆猶得口分食婦歸孫二載共養舅姑率月直一旬比姒長獨豐絜翁時出邀夏奉錢佐稍事其夫不能澹則益勤十指冬月皸瘃稍鬻嫁時裙繻至盡不解嘉慶十七年夏其夫病歿婦泣無聲旣俛尸視棺衾具則密縫禪襖牢結促製衰著訖又自絞苴經束之夜半給守嫗少休乃繼弔者驚歎趨同日歛年二十五無子里中諸生吳鶴告其友杜文麟等思所以存錄之者欽韓論之曰婦寒女也兄

公又儉無行者也婦揣之熟矣翁若嫗有二子在不患無
奉養婦則儻然無所歸耳雖欲一節患卒有奪之者生固
不如灰且恐灰稍遲無以自明其志也嗚呼匹婦耳其果
決明敏若此哉

擬策問五道

問齊魯韓詩說劉向許慎陸德明之書間存考其師授各不相蒙乃如騶虞鳥獸之官燕燕定姜之作均目魯韓感生證生民之詩韎任附鼓鍾之什兼及齊詩其同異附麗果可信歟漢廣引交甫之魃服新臺比宣公於蟾蜍似乖說經之體其果出於薛君歟鄭君晚見毛詩所注三禮何以不復更改采葑采菲坊記戒其盡利出宿餞禰虞禮據爲送尸說詩之旨推移若此傳記中能更僕數歟鄭於小雅四篇推舉厲王所據者何家他若昏娶異期練祥殊服后稷周公義有優劣六月常武事有參差其牴牾可悉舉

軟王肅伸毛難鄭有從鄭者幾條王基馬昭孫毓孔晁張融輩主客左袒孰爲定評學士弦誦歌舞久矣解頤之論所願折衷

問春秋一經制作如山俗師衡決異論莫定公羊六傳而著竹帛十口相承寧無褫亂遭雜伯之世其藝獨顯得毋刑法家附聖經以逆時王歟云公羊穀梁皆春秋後百餘年所作又獨謂公羊戰國人見於何書公羊之失賈逵鄭衆等所論何事殆未足關其口拔其角歟彼何休者憾其家敗績失據橫樹頰頰益復猖狂以春秋王魯儀父宿男盟而得封滕子薛伯朝而進爵是非以周王爲天囚歟善

狄之救齊進而稱人以楚爲京師斥晉當誅原其立義與聖者生同日便推以爲聖與盜者貌偏同卽執以爲盜若敗績貿戎侵柳園郊皆謂職晉犯上聖人之旨可厚誣歟成昭十年定十四年皆無冬以爲成公盜天牲當誅故去冬質諸二傳仍有冬也昭十年爲取吳孟子之年何所據依定十四年孔子去魯無冬然則上律天時自以去就爲褒貶定哀微辭抑又良乖季姬一弱女越境與國君淫叔術娶嫂謂賢者宜有後不亦妖妄之尤者歟又以戕爲支解以用爲持足築頭殆習聞胡亥之酷烈然與謂辜內以弑君論辜外以傷君論恐司空城旦書不如是兒戲也治

經之家猶欲揚其波是亦天資刻薄者矣石渠之高議可得聞乎

問輿地之學先沿革而後形勢三十六郡四十郡所主參差高武昭平分改凡幾光武省并桓靈建置班略於前彪昧於後三國鼎峙郡國互增舊十三州亦有分析雍涼荆揚犬牙相錯地形要害可悉數否南渡後僑郡所寄遙州所鎮或因勢緩急移徙軍屯彭城壽春進退非一夏口襄陽經略各殊僑立既久舊名轉掩職方昧其本註家承其繆可一一數歟蕭子顯之志有割屬度屬之分拓跋氏之書有雙頭對掌之目能稽其故歟周隨之間瓜分棋置固

不足道其廢郡而州改州卽郡先後何時唐初總管統於
行臺者有幾都督分爲大中下者何所天寶以前緣邊禦
戎惟八節度使厥後兵興節度觀察內地相望可枚舉歟
刺史有輔望雄大之差縣令有畿赤上下之別官同而秩
懸羈縻之州統二十四都督其都護更有幾方內之地屬
十五道採訪使其守捉復何所府兵之舊隸於州者尚可
按歟宋之州軍別有武官總管鈐轄都監視州之大小同
是州也或比支郡或同帥臣於軍營或統屬或平行制度
可得言歟元置行省行臺行院廉訪而下始爲路府州縣
寺署如蠡窠能舉其蕃漢相維之制歟明仍元舊別立三

司分統軍民其有都司無布按有衛所無州縣者有幾九
邊三衛罷廢添設能揣其機宜否古之言輿地者僅存李
吉甫樂史歐陽忼王象之祝穆諸家或謹於掌固所職或
侈於土訓所聞學者取捨將安所在臧旻賈耽盡地成圖
其諸君子亦樂道之歟

問鄭氏注周官況以漢法通儒之學鑒今知古也春秋時
三卿五大夫一卿兼二職五大夫又署何官或謂司馬職
簡僅一大夫然春秋所亟者軍政也其說非歟秦之爵見
於春秋楚之官循於後來者有幾西京員數往爲煩冗并
省東京始稱畫一三公分領九卿九卿領諸官署令丞將

大夫或職屬或名屬能條別之歟南北軍制志中具悉唐之十六衛六軍特倣其義而學者多昧斯旨遂有兵志之補黎陽雍營藩衛屹然將輕權重抑又何歟昭宣以下孰領中朝孰專外朝又左右曹給事中本非專官僕射祭酒諸署皆有展轉相沿遂乖其義尚書令侍中皆親昵小官而後以冠百寮其中書令始於何帝重於何代並立爲三省者又何時唐太宗制同三品議政事嗣後執筆判事不必真宰相宰相之名或優假勲舊不必知政然高宗後政印歸中書門下省尚書省長拱手受成光宅開元時又有文昌左右相左右丞相之號何歟漢三公而外若太傅若

大將軍謂之五府其位非公而從公者始於何人其名若何儀同三司辟召開府皆從公也而宇文氏析爲官號又淩卑冗亦不學無術歟漢之將軍金印紫綬武冠之名雖見於書不謂將軍也三國而還方嶽大臣各冠征鎮軍人隊主益廣雜號由崇卑而分清濁由清濁而分文武其源流可得詳歟勲階次第沿於黑獺緋紫龜魚又名章服均是結銜官階之高下不侔或稱行或稱守章服之重輕又異或有賜或有借乃有職爲宰相階僅朝郎官是雜流勲已柱國或得列戟爲名閥或當番直如令史能別白之歟宋文武二班之外又有橫行省司寺監只爲寄祿別有遣

差吏部不事也有審官院兵部不事也有三班院十二衛將軍不知兵也有侍衛殿前司文資武階又互相易其官制最紊且畱司宮觀學士待制雖以優假士大夫得毋類於冗食歟大臣判郡其監司之體制何如貴戚遙領於州府之文書何若元豐改行之制南渡沿革之規可一一數歟元以蒙古爲長而副以色目漢人其國王帝師投下萬戶各有分地職守能悉言之歟明之十三省初止都布按三司巡撫之名始於何時罷而復設者何年中葉設總制總督惟宣大三邊兩廣雲貴洎兵興日棘逐漸增加又有文武總理其衝者數百里內有督有撫星羅碁布能具舉

之歟督撫有標兵鎮協分守有所部則所謂都司者職掌安在歟此皆古今盛衰得失之故可以考鏡者也悉舉所聞以對

問科舉取人自漢尚矣射策對策所試何分自甲至丙所授何等郡舉孝廉州舉茂才歲數何定左雄限年之法桓帝試經之制疎密何似自漢晉間試太常策東堂厥有明文擢爲第一者能悉舉其人否程試之文見於隋唐經籍藝文者其名目尚可舉歟唐太宗以進士試歸於有司然則古之賓興用鹽計偕充廷不幾失其義歟親試舉人者何時侍郎掌貢舉者何代科目雖多隨時舉歟要非通制

書判拔萃博學宏詞又不關禮部惟明經進士兩途終始
唐宋放榜之額出身之差或連歲舉或間歲舉有通場下
第有一榜及第有別頭舉人有覆試進士或已放而覆落
或未放而過省有官已顯而補賜出身有身已歿而追放
及第都凡可言歟廷對始名狀元特奏每恥老榜政和上
舍之制南渡太學之等官韻之限帖經之式或革進士或
並解額月課歲試升齋釋褐其同異能悉舉歟金元貢舉
或罷或設蒙古人又別榜然高者應奉翰林次者沈滯掾
史得毋銓序之故苛歟明之八股目其濫觴或元或宋真
僞孰定其初主文之官首選之士何人進士入翰林庶吉

士卽改科道又於何年鄉試考官不必朝命經房分校不必見任能舉其要否三百年中階緣臚仕利病得失益可言矣邱濬之程王鏊之式何以翕然推重後之元局元訣揣畫愈巧瞿景淳田一儁輩何以猶有訾議鄧黃之伯仲陶董之後先果有定評否隆慶以後考官之程文孰爲最著陶望齡後孫鑛許獬輩每況愈下者究可指歟謂陳名夏以狂怪濁亂之文應亡國之運何以唐宋末不見有此等議論成化迄崇禎以其技名者幾輩號八大家者次第可舉否有文望過之而不與其列何歟西安西江幾社復社之表表者凡幾評泊之人品隲之目若文韻文定者可

枚舉歟不得科第而制藝行世者幾家文稿之最富者何
人諸君日從事於斯不當數典而忘祖歟